

四庫全書

史部

欽定四庫全書

欽定續通志卷四百五十一

列傳

元五

耶律楚材 鑄

扎哈

鈕祜祿重山

楊惟中

耶律楚材字晉卿遼東丹王托雲八世孫父履以學行
事金世宗終尚書右丞楚材三歲而孤母楊氏教之學

及長博極羣書旁通天文地理律曆術數及釋老醫卜
之說為文若宿構金制宰相子例試補省掾章宗詔問
疑獄數事同試者十七人楚材對獨優遂辟為掾後仕
為開州同知貞祐二年宣宗遷汴完顏福興行中書事
留守燕辟為左右司員外郎太祖定燕聞其名召見之
曰遼金世讐朕為汝雪之對曰臣父祖嘗委質事之既
為之臣敢讐君耶帝重其言處之左右夏人常八斤以
善造弓見知於帝每自矜曰國家方用武耶律儒者何

用楚材曰治弓尚用弓匠為天下者豈可不用治天下匠耶帝聞之甚喜日見親用壬午八月長星見西方楚材曰女真將易主矣

謹按通鑑輯覽

御批金距此時逾一年四月始易主何係於長星之見且彼時南有宋而北有金蒙古亦方興之國而西方則西夏之地長星究為誰見耶此不過附會楚材明年金宣宗果殂明天文之說而不知其怪誕已甚也

帝每征討必命楚材卜帝亦自灼羊脾以相符應甲申帝至東印度駐鐵門關有一角獸形如鹿而馬尾其色綠作人言謂侍衛者曰汝主宜早還帝以問楚材對曰

此瑞獸也名角端好生惡殺此天降符以告陛下願承天心以全民命帝即日班師丙戌從下靈武諸將爭取子女金帛楚材獨收遺書及大黃藥材既而士卒病疫得大黃輒愈帝自經營西土未暇定制州郡長吏生殺任情燕薊留後長官舒穆魯軒達布尤貪暴楚材奏請州郡非奉璽書不得擅徵發囚當大辟者必待報違者罪死於是貪暴之風稍戢燕多劇賊時睿宗以皇子監國遣楚材窮治之楚材詢察皆留後親屬及勢家子盡

捕下獄戮十六人於市民始安己丑秋太宗將即位楚材告親王察罕台曰王雖兄臣也禮當拜王然之率皇族及臣僚拜帳下元制尊屬有拜禮自此始時朝集後期應死者衆楚材言於帝悉宥之中原甫定民多誤觸禁網而國法無赦令楚材議請肆宥詔自庚寅正月朔日前事勿治且條便宜一十八事帝悉從之奏立燕京等十路徵收課稅使凡長貳悉用士人廩籍充足拜中書令事無鉅細皆先白之楚材奏凡州郡宜令長吏專

理民事萬戶總軍政所掌課稅權貴不得侵之又舉扎哈鈕祜祿均與之同事權貴不能平軒達布以舊怨尤疾之譖於宗王宗王遣使以聞帝察其誣責使者罷遣之屬有訟軒達布不法者帝命楚材鞫之奏曰此人倨傲故易招謗今將有事南方他日治之未晚也帝私謂侍臣曰楚材不較私讐真寬厚長者中貴克斯布哈奏採金銀役夫及種田西域與栽蒲萄戶帝令於西京宣德徙萬餘戶充之楚材曰先帝遺詔山後民質樸緩急

可用不宜輕動今將征河南請無殘民以給此役帝可
其奏壬辰帝南征將涉河詔逃難民來降者免死焚材
請製旗以給降民使歸田里全活甚衆汴梁將下大將
蘇布特言金人抗拒持久城下之日宜屠之焚材馳入
奏曰得地無民將焉用之帝猶豫焚材曰奇巧之工厚
藏之家皆萃於此若盡殺之將無所獲帝然之止罪完
顏氏餘勿問時避兵居汴者得百四十七萬人焚材請
求孔子後得五十一代孫元措奏襲衍聖公命收太常

禮樂生召名儒梁陟王萬慶趙著等使直釋九經進講
東宮又率大臣子孫執經解義俾知聖人之道置編修
所於燕京經籍所于平陽由是文治興焉時河南初破
有旨居傳逃民及資給者減其家鄉社連坐由是逃者
多殍死道路焚材從容進曰河南既平民皆陛下赤子
走復何之帝悟命除其禁金既亡唯秦鞏二十餘州未
下焚材曰往年吾民逃罪或萃於此故以死拒若許以
不殺將不攻自下矣詔下諸城皆降乙未朝議將四征

不庭欲遣回回人征江南漢人征西域楚材曰中原西域相去遼遠未至敵境人馬已疲無水土異宜疾疫將生宜各從其便從之丙申諸王大集帝親執觴賜楚材曰朕所以得安枕者卿之力也帝議裂州縣賜親王功臣楚材曰裂土分民易生嫌隙不如多以金帛與之帝曰已許奈何楚材曰若朝廷置吏收其貢賦歲終頒之使毋擅科徵可也帝然其計遂定天下賦稅朝議以為太輕楚材曰作法於涼其弊猶貪後將有以利進者則

今已重矣時侍臣托歡奏簡天下室女詔下楚材尼之
不行帝怒楚材進曰向擇美女二十有八人足備使令
今復選拔臣恐擾民欲覆奏耳帝良久曰可罷之丁酉
楚材奏曰制器者必用良工守成者必用儒臣儒臣事
業非積數十年殆未易成帝曰果爾可官其人楚材曰
請校試之乃命宣德州宣課使劉中隨郡考試以經義
詞賦論分為三科儒人被俘為奴者亦令就試其主匿
弗遣者死得士凡四千三十人免為奴者四之一至於

一衡量給符印立鈔法定均輸布遞傳明驛券庶政畧
備民稍蘇息焉有二道士爭長誣具讐之黨人為逃軍
結中貴及通事楊惟中執而虐殺之楚材按收惟忠中
貴中貴訴楚材違制帝怒繫楚材既而悔命釋之楚材不
肯解縛曰臣備位公輔國政所屬陛下初令繫臣以有
罪也今赦臣是無罪也豈宜輕易反覆如戲小兒國有
大事何以行焉帝溫言慰之楚材因陳時務十策曰信
賞罰正名分給俸祿官功臣考殿最均科差選工匠務

農桑定土貢制漕運悉施行之太原路轉運使呂振副使劉子振以贓抵罪帝責楚材曰卿言孔子之教可使儒者為好人何故乃有此輩對曰聖人之教如天之有日月豈得緣一夫之失廢萬世常行之道乎帝意乃解帝素嗜酒日與大臣酣飲焚材屢諫不聽乃持酒槽鐵口進曰麴蘖能腐物鐵尚如此況五臟乎帝悟敕近臣日進酒三鍾而止自庚寅定課稅格歲有增羨至戊戌增至一百一十萬兩譯史安天合引溫都爾哈瑪爾撰

買課稅

按丘濬大學行義補云撲買之名起於宋開寶三年謂通計應得稅錢任辦此數先輸之官而

聽其取贏

又增至二百二十萬兩楚材極力辨諫至聲色

於民也

俱厲言與涕俱帝不聽楚材歎曰民之困窮自此始矣
楚材當國日久得祿分其親族未嘗私以官行省劉敏
從容言之楚材曰睦親之義但當資以金帛若使從政
違法吾不能徇私恩也歲辛丑冬十一月帝出獵崩於
行在所皇后尼瑪察氏稱制庶政多紊溫都爾哈瑪爾
以貨得政柄廷臣悉畏附之楚材面折廷爭言人所難

言人皆危之居無何朝廷用兵事起倉卒后欲西遷以避之楚材進曰朝廷天下根本根本一搖天下將亂臣觀天道必無患也後數日乃定后以御寶空紙付溫都爾哈瑪爾使自書填行之楚材曰朝廷自有憲章今欲紊之臣不敢奉詔事遂止又有旨凡溫都爾哈瑪爾所建白令史不為書者斷其手楚材曰國之典故先帝悉委老臣令史何與事若合理自當奉行如不可行死且不避況截手乎后不悅楚材大聲曰老臣事太祖太宗

三十餘年無負於國皇后豈能無罪殺臣也后雖憾之亦以先朝舊勲深敬憚焉甲辰卒

續通鑑
作癸卯

皇后哀悼賻

贈甚厚後有譖楚材者言其在相位日久天下貢賦半入其家后命近臣瑪爾結覆視之唯琴阮十餘及古今書畫金石遺文數千卷至順元年追封廣寧王謚文正子鉉鑄

鑄字成仲幼聰敏善屬文尤工騎射楚材歿嗣領中書省事時年二十三上言宜疎禁網遂采歷代德政合於

時宜者八十一章以進歲戊午憲宗征蜀詔鑄領侍衛
驍果以從屢出奇計攻下城邑己未憲宗崩額呼布格
叛鑄棄妻子自朔方來歸世祖嘉其忠中統二年拜中
書左丞相詔將兵備禦北邊後徵兵扈從敗額呼布格
於上都之北至元元年奏定法令三十七章吏民便之
二年行省山東未幾徵還初清廟雅樂止有登歌詔鑄
製宮懸八佾之舞四年春樂舞成上之賜名大成十九
年復拜中書左丞相二十年坐不納職印妄奏東平人

聚謀為逆間謀幕僚及黨罪囚阿里沙遂罷免仍沒其家貲之半徙居山後二十二年卒子十一人希徵希勃希亮希寬希素希固希周希光希逆餘失其名至順元年贈懿寧王謚文忠

扎哈齊里台氏初以軍伍長從太祖同飲班珠爾河水與諸王百官大會鄂諾河上太祖尊號曰青吉斯皇帝

歲庚午從太祖征奈曼有功

按太祖紀元年丙申征奈曼禽博囉汗以歸奈曼部

由是遂亡此云庚午則是太祖之五年也恐誤

賜良馬一疋申從攻庫楚克諸

國為錫里巴從攻塔塔爾欽察唐古哲袞契丹女真河西諸國所俘生口悉以上獻命屯田於阿嚙罕立鎮海城戍守之壬申從太祖謀定漢地師次隆興與金將呼齊呼戰矢中臆間裹瘡而出者復數四既破燕拜中書右丞相己丑太宗即位扈從至西京攻河中河南鈞州癸巳攻蔡州以功賜恩州一千戶先是收天下童男童女及工匠置局弘州既而得西域織金綺紋工三百餘戶及汴京織毛褐工三百戶皆分隸弘州命鎮海世掌

馬定宗即位以扎哈為先朝舊臣仍拜中書右丞相卒
子十人博果斯繼食其封邑從世祖征花馬大理率兵
千人結浮橋於金沙江以濟師中統初論功授益州等
路宣撫使二年改東平路副達魯噶齊討平叛寇尋遷
濟南等路宣慰至元二年遷南京路達魯噶齊四年討
平蘄縣叛民以病乞謝事特授保定路達魯噶齊歸老
於家卒

鈕祜祿重山金源貴族也國初為質子遂委質焉太祖

使為宿衛官筆且齊從平諸國有功圖涼州執大旗指
麾六軍手中流矢不動已而為侍從官數得侍宴內廷
因諫曰臣聞天子以天下為憂憂之未有不治忘憂未
有能治者也置酒為樂此忘憂之術也帝嘉納之歲辛

卯授左丞相時耶律楚材為右丞相

按重山入相據本
紀係太宗三年原

傳作太祖時事今改正又按太宗紀三年以耶律楚材
為中書令重山為左丞相札哈為右丞相與此互異

凡建官立法任賢使能與夫分郡邑定課賦通漕運足
國用多出楚材而重山佐成之乙未從伐宋詔軍前行

中書省事師入宋境江淮州邑望風款附降其民三十餘萬取定城天長二邑不誅一人復入中書視事卒封魏國公諡忠武戊戌詔其子江淮安撫使納罕嗣行軍前中書省事時大將察罕下壽春欲屠其城納罕勸止之初世祖伐宋軍於汴納罕曰李璫承國厚恩坐制一方然其人多詐叛無日矣帝亦患之中統元年兩遷宣撫使三年遷秦蜀五路四川行中書省事其年李璫反帝使諭納罕曰卿言猶在耳璫果反矣卿宜謹守西鄙

對曰臣謹受詔不敢以西鄙為陛下憂明年授中書平章政事以病卒封魏國公謚宣昭子博袞徹爾知河中府

楊惟中字彥誠弘州人金末以孤童子事太宗知讀書有膽略太宗器之年二十奉使西域三十餘國宣暢國威俾皆籍戶口屬吏以歸帝於是有大用意皇子庫春伐宋命惟中於軍前行中書省事克宋棗陽光化等軍先隨郢復等州及襄陽德安府得名士數十人收伊洛

諸書送燕都立宋大儒周惇頤祠建太極書院延儒士
趙復王粹等講授其間遂通聖賢學慨然欲以道濟天
下拜中書令定宗即位平陽道斷事官希薩橫恣不法
詔惟中宣慰惟中按誅之金將武仙餘黨散入太原真
定間聚衆剽掠詔會諸道兵討之不克惟中諭降其渠
帥餘黨悉平憲宗即位世祖以太弟鎮金蓮川得開府
專封拜乃立河南道經畧司於汴梁奏惟中等為使俾
屯田唐鄧申裕嵩汝蔡息亳潁諸州劉福為河南總管

貪鄙殘酷虐害遺民惟中至召聽約束福稱疾不至惟
中設大挺於坐復召之福不得已以數千人擁衛見惟
中惟中握大挺擊仆之數日福死河南大治遷陝右四
川宣撫使時諸軍帥橫侈病民郭千戶者尤甚惟中戮
之以徇關中肅然歲己未世祖總統東師奏惟中為江
淮荆湖南北路宣撫使俾建行臺以先啟行宣布恩信
蒙古漢軍諸帥並聽節制師還卒於蔡州中統二年謚
忠肅

欽定續通志卷四百五十一

欽定四庫全書

史部

欽定續通志卷四百五

三至
四

編修臣謝振定覆勘

總校官原任侍講臣王燕緒

欽定四庫全書

欽定續通志卷四百五十二

列傳

元六

塔本

阿爾濟蘇特穆爾
索約勒哈陶默色

德呼威蘇

蘓克

孟克薩喇

博迪蘇

李楨

高智耀睿

特爾格

塔本伊吾廬人人以其好揚人善稱之曰揚公初從太祖討諸部屢阨艱危復從圍燕征遼西下平灤白霄諸城戒軍士毋妄殺太祖聞而喜之俾鎮撫白霄諸郡號行省都元帥久之徙治興平興平兵火傷殘慘無生意塔本召父老問所苦除之薄賦斂役有時歸者四集始至戶止七百不一二年乃至萬戶庚寅詔益中山平定平原隸行省甲午盜李仙趙小哥等作亂塔本止誅首惡宥其誅誤癸卯卒追封營國公諡忠武子阿爾濟蘇

特穆爾

阿爾濟蘇特穆爾嗣父職為興平等處行省都元帥一
遵先政興學養士輕刑薄徭雖同僚不敢私役一民從
伐高麗有功歲丙辰卒追封營國公諡武襄子阿勒台
憲宗時命為平灤路達嚕噶齊始至請蠲銀鹽酒等稅
八之一至元十年歲饑發粟賑民全活甚衆僚屬始至
阿勒台必遺之鹽米羊畜什器曰非有他也欲其不剥
民耳姻族窮者月有常給民喪不能葬者與之棺槨灤

為孤竹故國乃廟祀伯夷叔齊以勵風俗二十五年卒
追封永平郡公諡忠亮子德呼威蘇

德呼威蘇少好讀書成宗時入宿衛累遷河間路總管
屬歲饑出俸金及官庫所積賑之活數十萬人河間當
水陸要衝四方供億皆取給焉德呼威蘇立法調遣民
使之復增置便習弓馬尉益邏兵之數於是盜賊屏息
陵州羣凶為官民害悉收繫死獄中後升遼陽行省參知
政事子索約勒哈陶默色

索約勒哈陶默色年十二宿衛英宗潛邸掌服御諸物

英宗即位拜監察御史

按索約勒哈陶默色為監察御史時首言國家政柄總歸中書

不得隔越奏事凡有奏行布告並從中書省送國史翰林詳定可否廷議是之著為令語具載元典章本傳失

載

至治元年詔起大剎于京西壽安山與御史觀音保

等上章極諫以為東作方始而興大役以耗財病民非

所以祈福也初丞相特們德爾疾忌臺諫至是特們德

爾之子索諾木為治書侍御史密奏宿衛舊臣訕上以

揚已之直大不敬帝乃殺索約勒哈陶默色泰定初追

封永平郡公諡貞愍

按續通考作追封永平郡王元史類編作諡忠愍並與此異謹附識

蘇克蒙古奇味氏世傳李唐外族父輝圖事太祖嘗從
飲班珠爾河水蘇克沉勇有謀雅為太宗所知命使金
覘其虛實至河金人閉之舟中七日始登南岸又三旬
乃達汴及見金主曰天子念爾土地日狹民力日疲故
遣我致命爾能修歲幣通好則轉禍為福矣金主取金
卮飲之酒曰歸語汝主必欲加兵敢率精銳以相周旋
歲幣非所聞也蘇克飲畢即懷金卮以出默識其地理

阨塞城郭人民之彊弱既復命以金卮獻帝喜曰我得金於汝手矣復以賜之始徵兵南伐兵至河北岸方舟欲渡金軍陣於河南帝令儀衛導蘇克中行親率偏師乘陣西策馬渡河會睿宗軍亦由襄鄧至兩軍夾攻之及金亡詔賜金護駕士五人曰以旌汝為使之不辱也歲乙未授山西大達魯噶齊受命方出有回回六人訟事不實將抵罪遇諸途急止監者曰姑緩其刑當入奏復見帝曰此六人名著西域徒以小罪誅之非所以懷

欽定四庫全書

卷四百五十二

遠人也願以賜臣使自悔悟遷善為他日用帝意解召
六人謂之曰生汝者蘇克也其竭力事之其寬大愛人
多類此卒追封宣寧王諡忠襄子六人曰察罕曰伊魯
古都斯曰哈瑠圖曰呼蘭曰和塔拉布哈曰布哈察罕
伊魯古都斯哈瑠圖皆從烏拉齊太子出征以戰功顯
呼蘭襲職鉏疆植弱均役平刑闔郡安輯時西方多盜
有甄軍判者率羣盜往來阜平曲陽間殺人而奪之財
呼蘭曰此大盜也縣豈能制哉即遣千人捕甄殺之勦

其餘黨害乃除卒追封雲國公諡康忠子托多約蘇襲爵養母完顏氏以孝聞卒追封雲國公諡顯毅

孟克薩喇察罕扎拉爾氏曾祖齊拉衮克祖綽鄂父諾海並事烈祖及太祖嗣位年尚幼所部多叛亡綽鄂獨不去皇弟柴濟薩哈勒陰摘之去謝不從綽鄂精騎射帝甚愛之號為默爾根帝嘗與賊遇將戰有二飛鷺至命綽鄂射之一發而墜賊望見驚曰善射若此飛鳥且不能逃况人乎不戰而去從征奈曼敵率銳兵鼓而

進綽鄂按兵不動敵疑畏不敢前太祖征默爾奇斯兵潰綽鄂與其弟左右力戰以衛會烏梁海哲哩木來援敵乃引退諾海事太祖備歷艱險未嘗形于言帝嘉其忠且念其世勲詔封懷洛陽百七十五戶孟克薩喇事睿宗恭謹過其父嘗從攻鳳翔首立奇功定宗升為斷事官剛明能舉職憲宗在藩邸深知其人從征俄羅斯阿拉欽察諸部常身先諸將及頒所俘寶玉則一無所取憲宗益重之使治藩邸之分民雖太后及諸嬪御小

有過失知無不言以故邸中人咸敬憚之迺以為斷事
官之長其位在三公上猶漢之大將軍也既拜命出問
其僚曰我當以何道守官衆默然又問夏人果幹進曰
夫札爾古濟之道猶宰之封羊也解肩者不使傷其脊
在持平而已孟克薩喇即起入帳內為帝言之果幹由
是知名定宗崩宗王巴圖罕大會宗親議立憲宗輝和
爾巴拉曰實勒們皇孫也宜立諸大臣莫敢言孟克薩
喇獨曰先皇后立定宗時汝何不言耶有異議者吾請

斬之衆不敢異乃奉憲宗立之

按憲宗紀載巴拉欲立實勒們穆格折之巴拉

語塞烏蘭哈達及巴圖贊成之議遂定與本傳異

憲宗既立察哈台之子及阿

齊台等謀作亂剌車轅藏兵其中以入轅折兵見哈蘇

濟上變孟克薩喇即發兵出迎悉就禽憲宗親簡有罪

者付之鞠治孟克薩喇悉誅之由是委任益專有當刑

者輒以法刑之乃入奏帝無不報可癸丑卒帝以孟克

薩喇當國時多所誅戮及是咸騰謗言

按王惲撰史天澤家傳云監郡

孟克薩喇以兵數萬散處州郡間伐桑蹂稼井里騷然
是謗言亦非無因也本傳不載監郡之官豈其有諱詞

也迺為詔諭其子厯叙其祖父之忠勤以申警戒之意至順四年追封克國公子四人長托歡次托爾齊次額森特穆爾次特穆爾布哈特穆爾布哈子曰特濟訥曰噶勒哈斯曰博迪蘇

博迪蘇幼入宿衛為博囉齊厯事成宗武宗由光祿少

卿擢同知宣徽院事遷授左丞相延祐四年

原文誤作二年今依

仁宗紀及宰相年表改正

拜中書右丞相時承平日久君臣端拱百

姓乂安一時號稱極治英宗時以大宗正札爾古齊出

鎮北方邊民安堵泰定間還朝加太保

按三公表泰定元年巴延徹爾

為太保其二年至四年則圖古勒也博迪蘇為太保表失載

及都爾蘇構兵上都兵

潰博迪蘇奉璽紋來上文宗嘉之拜太傅卒博迪蘇為
人清慎寬厚號稱長者其歿也貧無以為斂人皆歎其
廉追封威平王三子長茂穆爾德濟次普爾普次巴朗
朗期而孤其母吉雅展氏二十而寡守節不他適後為
大宗正府札爾古齊

李楨字幹臣其先西夏國族子也金末楨以經童中選

既長入為質子以文學得近侍太宗嘉之賜名鄂爾綽
勒筆且齊從皇子庫春伐金下河南諸郡往唐鄧二州
數民實賑恤饑寒歸者如市戍從大將察罕下淮甸
以功授軍前行中書省左右司郎中奏訪天下儒士令
所在優贍之辛丑師圍壽春不下楨單騎入敵壘曉以
利害明日與其將二人率衆來降楨表言襄陽乃吳蜀
之要衝宋之喉襟得之可為他日取宋之基定宗嘉其
言庚戌授襄陽軍馬萬戶丙辰憲宗命楨率師巡哨襄

樊戊午帝親征召楨同議事卒于合州

高智耀河西人世仕夏國曾祖逸大都督府尹祖良惠
右丞相智耀登本國進士第夏亡隱賀蘭山太宗時召
見將用之遽辭歸皇子庫騰鎮西涼儒者皆隸役智耀
言其非便請除之皇子從其言欲奏官之不就憲宗即
位智耀入言儒者學堯舜禹湯文武之道用之則治宜
養其材以資用帝問儒家何如巫醫對曰儒以綱常治
天下豈方技所得比帝曰善前此未有以是告朕者詔

復海內儒士徭役無有所與世祖在潛邸已聞其賢及即位召見又力言儒術有補治道反覆數千言帝鑄印授之命凡免役儒戶皆從之時淮蜀士遭俘虜者皆沒為奴智耀奏請除之以風厲天下帝然之即拜翰林學士命循行郡縣區別得數千人或言其詭濫帝詰之對曰士譬則金也金色有淺深謂之非金不可才藝有淺深謂之非士亦不可帝悅更寵賚之智耀又言國初庶政草創綱紀未張宜倣前代置御史臺以糾肅官常至

元五年立御史臺用其議也擢西夏中興等路提刑按察使會西北藩王遣使入朝帝求報聘智耀請行至上京卒追封寧國公諡文忠子睿

睿資稟直亮智耀之北使也攜之以行及卒近臣以睿見時年十六授符寶郎出入禁闥恭謹詳雅授指揮副使累官嘉興路總管有宿盜晝掠民財睿下令生擒之一郡以寧擢江東道提刑按察使部內草竊陸梁聲言圍宣城郡將怯懦城門不開睿責之曰官先示弱民何

所憑命密治兵衛洞開城門寇以有備不敢進遂討平之遷浙西道肅政廉訪使鹽官州民有結黨持郡邑短長者審悉按以法改淮東道肅政廉訪使盜竊真州庫鈔有司追逮平民審讞得其情縱遣之未幾果得真盜拜南臺御史中丞務持大體有儒者風延祐元年卒追封寧國公諡貞簡子納麟自有傳

特爾格嘉納克氏克實密爾人父鄂拓克齊與叔父納摩俱學浮圖氏兄弟相謂曰世道擾攘吾國將亡東北

有天子氣盍往歸之乃偕入見太宗禮遇之定宗師事
納摩使鄂拓克齊省民瘼憲宗尊納摩為國師總天下
釋教鄂拓克齊亦貴用事領克實密爾萬戶奉詔往諭
克實密爾為其國主所殺帝發兵誅國主元貞元年封
代國公諡忠遂鄂拓克齊之歿特爾格甫四歲從納摩
入見帝方食雞輟以賜之特爾格捧而不食帝問故對
曰將以遺母帝奇之世祖即位召見命隸丞相博囉備
宿衛先是世祖事憲宗甚親愛後以讒稍疎國師導世

祖宜加敬慎遂友愛如初至是帝將用特爾格曰吾以
酬國師也於是特爾格年十七命掌饗膳湯藥日益親
密至元十六年特爾格奏曰武臣佩符古制也今長民
者亦佩符請省之以彰武職從之十七年進尚膳監時
高州人言境多野獸願捕以充貢特爾格曰捕獸充貢
徒擾民耳不可聽從之進司農寺達魯噶齊從獵巴雅
爾之地獵人射兔誤中名駝帝命誅之特爾格曰殺人
償畜刑太重帝驚曰誤耶史官必書亟釋之庾人有盜

鑿杭米者罪當死特爾格諫曰臣鞠庾人其母病盜杭
飲食母耳請貸之收人有盜割馳峯者將誅之特爾格
曰生割馳峯誠忍人也然殺之恐乖陛下仁恕之心詔

皆免死二十二年奏司農寺宜升為大司農司

按百官志至元

二十年改務農司為司農寺二十三年又改為大司農司本傳紀年均與志異

秩二品使天下

知朝廷重農之意制可桓州饑民鬻子女為食奏以官
帑贖之二十四年從征納顏至蘇爾圖之地叛王塔布
岱率兵奄至特爾格奏曰彼眾我寡當設疑以退之於

是帝張蓋據牀特爾格從容進酒敵懼有伏遂引去二十九年進中書平章政事大德三年乞解機務仍授平章政事議中書省事俾掌諸王朝見之禮七年復拜中書平章政事平灤大水奏請散財賑恤從之十年遼王托克托入朝從者執兵入大明宮特爾格劾止之王懼謝從幸晉山饑民相望特爾格輒發廩賑之既乃陳疏自劾帝稱善武宗即位有訴寧遠王庫庫楚謀逆者命誅之特爾格辨其誣得免死徙高麗仁宗皇慶元年授

金史紀事本末卷四十五
開府議同三司太傅錄軍國重事乃進奏世祖子惟寧
遠王在宜賜還從之二年卒追封秦國公諡忠穆加封
延安王諡忠獻子六人呼察淮東宣慰使平安努太平
路達魯噶齊額實赫同知山東宣慰使事呼喇台同知
真定總管府事伊克瑪勒同知都護府事重喜隆禧院
副使孫八人

欽定續通志卷四百五十二

欽定四庫全書

欽定續通志卷四百五十三

列傳

元七

史天倪

楫樞

權

史天祥

史天澤

格

史天倪字和甫燕之永清人曾祖倫少好俠金末中原

塗炭乃建家塾招徠學者所藏活豪士甚衆士族陷為

奴隸者輒出金贖之甲子歲大侵發粟八萬石賑饑者
士爭附之祖成珪倜儻有父風父秉直讀書尚氣節癸
酉太師國王穆呼哩南伐秉直率里中老稚數千人詣
涿州軍門降穆呼哩欲用秉直秉直辭而薦其子乃命
秉直管領降人家屬屯霸州甲戌從穆呼哩攻北京授
行尚書六部事庚寅以老歸鄉里卒三子天倪天安天
澤天倪姿貌魁傑穆呼哩見而奇之以萬戶統諸降卒
從畧地至東海所過城邑皆下因進言曰金棄燕遷汴

遼水東西諸郡金之腹心也我若得大寧以扼其喉襟
則金雖有遼陽終不能保矣穆呼哩善之先倫卒時河
朔諸郡結清樂社歲時像倫而祠之至是天倪選其壯
勇號清樂軍以從兄天祥為先鋒所向無敵分畧三河
薊州諸砦望風款服甲戌朝太祖于燕陳奇謀授馬步
軍都統管領二十四萬戶從穆呼哩攻高州又從攻北
京皆不戰而克乙亥授右副都元帥奉詔南征降平州
進兵真定真定武仙固守不下遂移軍圍大名破其城

丙子會穆呼哩兵於燕南清州監軍王守約平州推官
哈達俱以城叛謀越海歸金天倪追襲至樂安敗之殺
守約擒孟古丁丑徇山東諸郡軍中肅然遠近響應已
卯從穆呼哩徇河東至絳州其團樓牢不可破天倪命
穴其旁地虛樓陷遂拔之庚辰還軍真定武仙降穆呼
哩承制以天倪為河北西路兵馬都元帥行府事仙副
之天倪乃言於穆呼哩下令有剽掠者以軍法從事辛
巳降懷潞澤三州壬午破濟南水砦癸未徇山西遂克

三關不決旬定四十餘砦兵至河衛嚴實以兵來會請
自攻河衛天倪曰哈達布哈亦勍敵也實曰易與耳明
日實與布哈兵戰竟為所執天倪曰哈達以實歸汴必
在今夕急命馮存杜必貴率壯士伏延津柳渡遇存等
與戰敗之實得脫歸必貴戰死未幾帝命天倪回軍真
定甲申夏大名總管彭義斌以宋兵犯河朔天倪逆戰
於恩州義斌敗入保大名乙酉師還聞武仙之黨據腰
水鐵壁二砦以叛天倪擣其巢掩殺之仙怒謀作亂乃

設宴邀天倪天倪往為仙所殺

按金史武仙傳載仙與史天倪積不相能嘗欲

南走宣宗招之仙得牒大喜乃賊殺史天倪以真定降

天倪之赴真定也秉直戒

之曰觀武仙辭氣終不為我用宜備之天倪曰我以赤心待人人或相負天必不容願無慮秉直乃攜其孫揖權還北京至是人服其先識天倪死時妻程氏聞亂恐汚於賊乃自殺子五人其三人尚幼俱死於難惟揖權在

揖字大濟歲己亥知中山府事尋遷征南行軍萬戶翼

經畧徇地蘄黃所向有功壬寅天澤引見太宗乞解職授之帝以楫為真定兵馬都總管辛亥朝廷始徵包銀楫請以銀與物折仍減其元數詔從之又請立銀鈔相權法人以為便或請運鹽按籍計口給民以食楫爭其不可議遂寢有愬府僚於達官者質之無實將抵之死楫曰誅之固足以懲後未若宥之以愧其心乃杖而遣之中統元年授真定路總管同判本道宣撫司事真定表山帶河連屬三十餘城生殺進退咸倚專決楫謹身率

先明政化信賞罰任賢良汰貪墨恤災獨民咸德之所
舉州縣佐吏有文學者三十餘人後皆知名會天澤言
兵民之柄不可併居一門行之請自臣家始揖即日解
綬歸卒子炫常德管軍總管輝知孟州燧同知東昌府
事煊潼關提舉煬僉廣西按察司事

權字伯衡勇而有謀初以權萬戶從天澤南征歲壬子
天澤以萬戶改河南經畧使乃以權代其任甲寅屯軍
鄧州敗宋將高達於樊城己未世祖將兵伐宋權出迎

於淮西渡江次鄂州憲宗崩世祖北還命權總兵鎮武
磯山中統元年授沿邊鎮守諸軍總管萬戶至元六年
召問征南之策對曰襄陽乃江陵之藩蔽樊城乃襄陽
之外郭先克樊城則襄陽不戰自降然後駐兵嘉定耀
武淮泗事必有濟帝善其計七年宋兵侵邊權引兵破
之宋將夏貴以船萬艘載壯士欲奪江權進攻破之既
而轉糧于隨貴復引兵扼我前又破之制授河南等路
宣撫使尋充江漢大都督總制軍馬總管屯田萬戶改

真定等路總管兼府尹徙東平又徙河間卒

樞字子明父天安從秉直降太師穆呼哩以天倪為萬戶而質天安軍中丁丑從討錦州叛人張致平之己卯從畧地闕右生擒鄜州驍將張資祿乙酉武仙殺天倪於真定天安率衆來會天澤併力攻仙敗走之以功授行北京元帥府事撫治真定庚寅宋聚兵為仙援遣其徒趙和行間城中誣卒副李甲劉清嘗輸款為內應守將械兩人送府大帥趣命戮之天安揣知其詐請自鞠

之果得其情遂斬和以徇壬辰從伐金師還討劇盜梁
滿蘇傑等悉平之甲午權真定等路萬戶乙卯卒樞年
二十餘以勲臣子知中山府有治績甲寅天澤奏為征
行萬戶配以真定彰德衛州懷孟新軍戍唐鄧乙卯敗
宋舟師於漢水之鴛鴦灘戊午憲宗伐宋入自蜀從天
澤詣行在朝帝于大散關帝勞之命為前鋒宋劔州僑
治於苦竹崖續通鑑作苦竹隘前阻絕澗深數百尺恃險而不
備帝使樞偵之樞率健卒數十縋而下得其所以致師

處以聞帝趨樞急取之宋人懼乃降己未從天澤擊敗
宋將呂文德於嘉陵江追至重慶而還中統二年從天
澤扈駕北征三年李璫叛復從天澤往討之夾澗而陣
豎木柵於澗中淫雨暴漲柵盡壞樞曰賊乘吾隙俟夜
必出命作葦炬數百置軍中三鼓賊果至飛炬擲之風
怒火烈弓弩齊發賊大潰自相蹂躪死者不可勝計未
幾璫就擒至元四年宋兵圍開達諸州以樞為左壁總
帥悉統河南山東太原等軍宋兵聞之解去六年高麗

人金通精據珍島以叛

按洪福源及高麗傳至元六年高麗權臣林衍叛討之七年衍

死餘黨裴仲孫等立承化侯為王竄入珍島八年破珍島斬承化侯其黨金通精走耽羅十年拔耽羅誅之本

傳偏舉金通精故與二傳不甚符合討之歲餘不下七年進樞鳳州經畧

使樞至謂將佐曰賊勢方張未易力勝宜分軍為三多

張旗幟以疑之吾與諸君潛師擣其巢穴破之必矣與

戰大破之其地悉平十二年復以萬戶從丞相巴延伐

宋宋平署安吉州安撫使時新附之初民所在依險阻

自保樞以威信招懷之復業為民者以千萬計十四年

移疾還十九年起為東京路總管辭不赴二十三年拜
山東東西道宣慰使治濟南後又治益都明年卒子煥
後衛親軍都指揮使煇祕書少監

史天祥父懷德秉直弟也歲癸酉穆呼哩從太祖伐金
天祥隨秉直迎降於涿穆呼哩命懷德就領其黑軍隸
帳下署天祥都鎮撫選降卒二百人使領之招徠丁壯
得衆萬餘從取霸州文安等二十餘城東下淄沂密三
州所至皆先登詔從大軍攻燕不克甲戌畧地高州拔

惠和金源等十五城惟大寧固守不下乃合衆攻其城
懷德先登為流矢所中歿于軍乃以所統黑軍命天祥
領之天祥憤痛其父之死攻之愈急乙亥與大帥烏頁
爾降其北京留守音達琿同知烏庫哩進攻北京傍近
諸寨悉降之得老幼數萬勝兵八千西乾河達魯五指
山楊昭努獨固守不下天祥擊之大小百餘戰昭努死
達魯敗走得戶二萬授西山總帥兵馬興州節度使趙
守玉反天祥與烏頁爾分道討平之達魯復聚衆攻龍

山天祥敗之達魯戰死進克中興府張致盜據錦州從
穆呼哩討平之會契丹漢軍擒闕肅復利州諸寨悉平
丙子覲太祖於魚兒凼授提控元帥拔蓋金蘇復等州
獲金完顏努耶律實圖美遷利州節度使所部降民都
總管監軍兵馬元帥丁丑縛金將巢元帥又滅綽爾盜
衆萬人城庚州之車河己卯權兵馬都元帥蒙古漢軍
黑軍並聽節制下河東平陽等八十餘城庚辰至真定
穆呼哩使天祥攻城天祥請諭降之乃往見守將武仙

諭以禍福仙悟乃降穆呼哩以秉直之子天倪為河北西路兵馬都元帥鎮真定以天祥為左副都元帥引兵屯邢西仙兄貴以萬人壁於山上負固不下天祥由烏道扳援而上盡掩捕之

按金史武仙傳云兄貴為安國軍節度使史天澤擊之亦歸順

于遂下邢磁相三州從戰黃龍岡破單勝兗三州辛巳從取綏德廊坊等五十餘城壬午穆呼哩攻青龍金勝諸堡花帽軍堅守不下既破欲屠之天祥力諫而止癸未春還軍河中穆呼哩上其功授蒙古漢軍兵馬都元

帥總十二萬戶鎮河中徇西夏破賀蘭山甲申歸北京授右副北京等七路兵馬都元帥庚寅朝太宗於臚胸河乞致仕不允辛卯太宗用兵河南強之從行轉漕河上給餉諸軍壬辰命屯霸州行元帥府事初天祥夜中流矢鏃入頰骨不能出至是鏃自口出睿宗聞而閔之授海濱和衆利州等處總管兼領霸州御衣局人匠都達嚕噶齊行北京七路兵馬都元帥府事憲宗即位俾仍舊職戊午卒子彬江東提刑按察副使槐襲霸州御

永局人匠都達嚕噶齊

史天澤字潤甫秉直季子也善騎射勇力絕人從其兄
天倪帥真定乙酉天倪遣護送其母北歸既而天倪為
武仙所害府僚王守道追及天澤於燕曰變起倉猝部
曲散走多在近郊公能迴轡南行不招自至矣天澤毅
然曰兄弟之讐義所當復雖死不避況未必死邪即傾
貲裝易甲仗南還行次滿城得士馬甚衆天澤攝行軍
事遣監軍李伯祐詣國王博囉言狀且乞濟師天澤時

為帳前軍總領博囉承制命嗣兄職為都元帥俾實納
台將蒙古軍三千人援之合勢進攻盧奴仙驍將葛鐵
槍者擁衆萬人來拒戰天澤迎擊之生擒葛鐵槍餘衆
悉潰遂下中山略無極拔趙州進軍野頭會其兄天安
亦提兵至共擊仙敗之仙奔雙門遂復真定宋大名總
管彭義斌陰與仙合欲復取真定天澤同實納台拒諸
贊皇仙不得進義斌勢蹙焚山自守天澤以鐵騎摧鋒
而入縛義斌斬之仙復令謀者結死士於城中為內應

夜斬關入據其城天澤踰城東出至藁城求援於董俊
俊授以銳卒數百夜赴真定而實納台兵亦至捕叛者
三百餘人仙挾數騎走保西山抱犢砦實納台怒忿民
之從賊驅萬餘人將殺之

實納台傳作將士欲屠其民實納台力爭釋之

天澤

曰彼皆吾民但為賊所脅耳力爭得釋乃繕城壁立樓
櫓為不可犯之計招集流散存恤困窮以抱犢諸砦仙

之巢穴急攻下之仙遁去相衛諸州皆降太宗即位議

立三萬戶

按續綱目云三萬戶史天澤劉黑馬蕭札拉是也

分統漢兵天澤適

入覲命為真定河間大名東平濟南五路萬戶庚寅武
仙復屯兵於衛天澤合諸軍圍之金將完顏哈達率眾
十萬來援天澤以千人繞出其後與大軍合攻之仙逸
去遂復衛州壬辰太宗由白坡渡河詔天澤以兵由孟
津會河南至則皇弟圖類已破哈達軍于三峯山乃命
略地京東招降太康柘縣瓦岡睢州追斬金將完顏慶
善努於陽邑癸巳金主令完顏博索自黃龍岡

金史作
黃陵岡

來襲新衛天澤率輕騎馳赴之比至圍已合奮戈突至

城下呼守者曰汝等勉力援兵且至復躍出衆皆披靡
遂與大軍急擊博索等敗走蒲城天澤尾其後博索等
兵尚八萬俘斬殆盡金主以單舸東走歸德天澤追至
歸德與諸軍會新衛金主遷蔡元帥布展率軍圍之天
澤當其北面結棧潛渡汝水甲午正月蔡破天澤還真
定時政煩賦重貸錢於西北賈人以代輸累倍其息謂
之羊羔利民不能給天澤奏請官為償一本息而止繼
以歲饑假貸充貢賦積銀至一萬三千錠天澤傾家貲

率族屬官吏代償之又請以中戶為軍上下戶為民著
為定籍乙未移軍伐宋從皇子庫春拔棗陽及攻襄陽
宋兵以舟數千陳於峭石灘天澤挾一舟載死士直前
擣之覆溺者萬計丁酉從宗王昆布哈破光州降復州
進攻壽春宋兵夜出斫營天澤手擊殺數人麾下兵繼
至悉驅其兵入淮水死乘勝而南所向輒克壬子入覲
世祖時在藩邸極知漢地不治河南尤甚請以天澤為
經畧使至則興利除害誅郡邑長貳之尤貪橫者二人

境內大治阿勒達爾鈎較諸路財賦鍛鍊羅織無所不
至天澤以勲舊獨見優容天澤曰我為經畧使今不我
責而罪餘人我何安乎由是得釋者甚衆戊午從憲宗
伐宋已未駐合州之釣魚山宋將呂文德以艤艦千餘
泝嘉陵江而上北軍迎戰不利帝命天澤禦之分軍為
兩翼跨江注射親率舟師順流縱擊追至重慶而還中
統元年世祖召問治安之道疏對立省部以正紀綱設
監司以督諸路需恩澤以安反側退貪殘以任賢能頒

奉秩以養庶禁賄賂以防奸帝嘉納之繼命往鄂渚撤

江上軍還授河南等路宣撫使俄兼江淮諸翼軍馬經

略使二年夏拜中書右丞相天澤既秉政定省規十條

以正庶務

按王惲中堂事紀云天澤既相事皆讓同官曰天澤本武臣何克負荷但物務未安者老

夫通譯其間為諸君條達耳相則何敢當衆服其謙退史傳不載附錄於此

憲宗初年括戶

餘百萬至是諸色占役者大半天澤悉奏罷之三年李

璫叛同親王哈必濟討之聞璫入濟南笑曰豕突入豈

無能為也因說哈必濟曰璫多譎而兵精不宜力角當

以歲月斃之乃深溝高壘絕其奔軼四閱月城中食盡
軍潰出降生擒瓊斬于軍門初天澤將行帝臨軒授詔
責以專征俾諸將皆聽節度天澤未嘗以詔示人及還
帝慰勞之悉歸功於諸將天澤在憲宗時嘗奏臣始攝
兄天倪軍民之職天倪有二子一子管民政一子掌兵
權臣復入叨寄遇一門之內處三要職分所當辭臣可
退休矣帝不許至是言者謂李瓊之變由諸侯權太重
天澤遂奏兵民之權不可併於一門行之請自臣家始

於是史氏子姪即日解兵符者十七人至元三年皇太子燕王領中書省兼判樞密院事以天澤為樞密副使四年改中書左丞相六年帝以宋未附議攻襄陽詔天澤與駙馬呼喇珠往經畫之至則相要害立城堡以絕其聲援為必取之計尋以疾還燕八年進開府儀同三司平章軍國重事十年與平章阿珠等進攻樊城拔之襄陽降十一年詔與丞相巴延總大軍水陸並進天澤至郢州疾作命北歸還至真定卒遺奏願天兵渡江慎

勿殺掠語不及他贈太尉謚忠武進封鎮陽王天澤平
居未嘗自矜其能及臨大節論大事毅然以天下之重
自任年四十始折節讀書拜相之日門庭悄然或勸以
權自張天澤舉唐韋澳告周墀之語曰願相公無權爵
祿刑賞天子之柄何以權為言者慙服子格

格字晉明為亳州萬戶從攻襄陽下之衆軍渡江平章
阿珠將二十五萬戶居前每五萬戶擇一人為帥統之
格居其一格軍先渡為宋將程鵬飛所却身被三創喪

其師二百尋復大戰中流矢鵬飛身亦被七創乃敗走
其後樞密院奏格輕進請罪之帝念其功而薄其罪從
平章阿爾哈雅攻潭州砲激柵木傷肩矢貫其手裹創
先登拔之遂以軍民安撫留戍從攻靜江衆以賴輜自
蔽鑿城格所當砲礮蔽地車不可至乃伺隙率衆攀堞
而上拔之徇廣西十三州廣東三州皆下靜江受兵之
初溪洞諸夷皆降雲南格遣使諭之來者五十州雲南
爭之事聞詔聽格節度升廣南西道宣慰使宋亡張世

傑據福州立益王傳檄嶺海詐言夏貴已復瀕江州郡
諸戍將以江路既絕不可北歸皆託計事還靜江格曰
君等亦為虛聲所懼邪待貴踰嶺審不可北歸吾與諸
君取塗雲南而還未為不可敢輒棄戍哉行省議棄廣
東之肇慶德慶封州併兵戍梧州格曰棄地撤備示敵
以怯不可宜增兵戍之劇賊蘇仲集潰卒據鎮龍山劫
掠於外耕植於內聞大兵至則偽出降官軍畏暑不敢
深入橫象賓貴四州皆被其害格築堡於其界守以土

兵令官軍火其廬柵民踐其禾稼仲窮蹙遂降益王餘
衆破潯州斬李辰李福靜江北抵泉永皆城守羅飛圍
永凡七月不下判官潘澤民間道來告急格分兵赴之
殄其衆益王死衛王立趣廣州避海中崖山遣曾淵子
據雷州諭之降不聽進兵攻之淵子奔碭洲世傑將兵
數萬欲復取雷州戍將劉仲海擊走之後悉衆來圍城
中絕糧士以草為食格漕欽廉高化諸州糧以給之世
傑解圍去詔格戍雷州衛王死嶺東西悉平入覲拜湖

廣行中書省右丞旋進平章政事卒子燿福建行省平
章政事榮鄧州舊軍萬戶



欽定續通志卷四百五十三

欽定四庫全書

欽定續通志卷四百五十四

列傳

元八

董俊

文蔚
文忠

文用

汪德臣

良臣
惟正

董俊字用章真定藁城人少力田長涉書史善騎射金
貞祐間邊事方急藁城令哩迪募兵拔俊為將將所募
兵迎敵歲乙亥國王穆呼哩帥兵南下俊降己卯以勞

擢知中山府事金將武仙據真定定武諸城皆應仙俊
率衆夜入真定逐仙走之定武諸城復來附庚辰金大
發兵益仙俊軍時屯曲陽仙銳氣來戰敗之黃山下仙
降穆呼哩承制授俊龍虎衛上將軍行元帥府事駐橐
城俊謁穆呼哩曰武仙黠不可測終不為我用請備之
穆呼哩然其言承制授左副元帥乙酉仙叛旁郡縣皆
為仙守俊孤軍拒守永安仙攻之期年無所利俊出兵
掩擊之仙敗走久之俊復夜入真定仙走死乃納史天

倪弟天澤為帥

按太祖紀武仙殺史天倪以真定叛天倪弟天澤擊仙走之復真定天澤傳所

戴亦同與此互異

壬辰會諸軍圍汴明年金主棄汴奔歸德追

圍之金兵夜出薄諸軍於水俊力戰死焉俊早喪父事

母以孝聞待族親故人皆有恩意里夫家僮亦接之有

道克汴時以侍其軸為賢延歸教諸子誠諸子曰吾一

農夫耳遭天下多故徒以忠義事人僅立門戶願汝曹

力田讀書勿求非望為吾累也每慕馬援為人曰馬草

裏屍援固可壯故戰必持矛先士卒先是戊子歲朝於

行在諸將獻戶口各增數要利俊曰民實少而欺以數多他日上需求無應必重斂以承命是我獨利而民日困也永安節度使劉成叛俊下令曰逆者一人餘能去逆即忠義士與其家財仍奏官之衆果去成降沃州民砦天臺為盜既破降之他將利其子女欲掠之俊曰城降而俘其家仁者不為也南征時人多歸俊願為奴既歸悉縱為民鄰境人有被掠賣者亦與直贖還之大小百戰無不克捷為政寬明所至民惟恐其去封壽國公

謚忠烈改封趙國公子文炳文蔚文用文直文忠文炳
自有傳

文蔚字彥華兄文炳為橐城令辛丑起民兵南征文
炳命文蔚率十有七人自為一隊與衆軍渡淮甲寅
世祖收大理還駐六盤山文炳以文蔚孝謹公勤解所
佩金符以讓帝嘉之授橐城等處行軍千戶南鎮鄧州
時沿邊城壁未築是年冬修光化乙卯立毘陽丙辰築
棗陽文蔚悉總之見執役者常以善言撫卹弗事威猛

衆咸感之丁巳攻襄樊城兵不得渡文蔚夜領兵士於湖水狹隘處伐木拔根立於水實以薪草為橋梁至曉師悉渡圍已合城中大驚文蔚復統已圖軍以當前行奪其外城論功居最己未憲宗伐宋入川蜀文蔚奉詔將兵西上由褒斜歷劍閣長驅而前至釣魚山崖壁巉峭惟一徑可登恃險阻未即降帝命攻之文蔚激厲將士挾雲梯冒飛石履崎嶇以登直抵其寨苦戰頃之兵士被傷乃還中統二年世祖置武衛軍文蔚以鄧兵入

為千戶帝北狩留屯上都三年李璫反文蔚以軍圍濟
南城破璫誅奏功還至元五年卒於上都之炭山弟文
忠時為樞密僉院乞護喪南還帝甚憫之泰定中贈隴
西郡伯

文用字彥材弱冠試詞賦中選時以真定橐城奉莊聖
太后湯沐庚戌太后命擇邑中子弟來上文用從文炳
謁太后于和琳世祖在潛藩命文用主文書講說帳中
常見許重癸丑世祖征雲南大理文用與弟文忠從軍

督糧械贊軍務丁巳世祖令授皇子經己未伐宋文用
理軍需將攻鄂州宋賈似道呂文德將兵來拒軍容甚
盛世祖臨江閱戰文炳求先進戰文用與文忠偕行大
破宋師世祖即位建元中統文用持詔宣諭邊郡且擇
諸軍充侍衛二年以兵部郎中參議都元帥府事三年
李璫叛從元帥庫庫岱統兵誅之山東平阿珠奉詔伐
宋召文用為其屬文用謝病不行至元改元召為西夏
中興等路行省郎中中興自瑛塔哈之亂民間相恐動

竄匿山谷文用置書通衢諭之民乃安始開唐來漢延
秦家等渠壑中興西涼甘肅瓜沙等州之土為水田民
之歸者四五萬戶悉授田種頒農具更造舟置黃河中
受諸部落及潰叛之來降者時諸王哲伯特穆爾鎮西
方其下縱橫需索省臣不能支文用輒折以法其徒積
怨譖文用於王王怒使左右雜問之文用請與王傳辨
王即遣其傳訊文用其傳中朝舊臣不肯順王意文用
謂之曰王以重威鎮遠方而其下毒虐百姓凌暴官府

於事體不便因厯指其不法數十事其傳驚起去白王
王召丈用謝之自是譖不行而省府事頗立二年入奏
經畧事宜還以諭旨行之中興遂定八年授山東東西
道巡行勸農使山東自更叛亂野多曠土丈用巡行勸
勵無間幽僻入登州境見其墾開有方以郡守為能作
詩表異之於是列郡咸勸五年之間政績為天下勸農
使最十二年丞相安圖奏為工部侍郎代赫舍哩赫舍
哩名
耳見阿哈
瑪特傳赫舍哩阿哈瑪特私人也其徒既讒間安圖

罷相即使鷹監奏工部侍郎不給鷹食鷹且瘦死帝怒
召治之因急捕文用入帝望見曰董文用乃為爾治鷹
食者耶置不問十三年出為衛輝路總管郡當衝要民
為兵者十之九餘皆單弱貧病不堪力役會初得江南
圖籍金玉財帛之運日夜不絕於道警衛輸輓日役數
千夫文用慮妨耕作乃從轉運主者言州縣吏卒足以
備用不必重煩吾民主者曰萬一有不虞罪將誰歸文
用即手書具官姓名保任之民得以時耕而運事亦不

廢諸郡運江淮粟於京師衛當運十五萬石文用集旁
郡議立驛置法民力以舒十四年汴漕司議通沁水合
流御河以便漕文用曰衛為地最下大雨時行沁水輒
溢不得達於河即浸淫及衛今又引之使來豈惟無衛
將無大名長蘆矣會朝廷遣使相地形上言衛州浮屠
最高者纔與沁水平勢不可開事遂寢十六年受代歸
田里讀書賦詩怡然燕居裕宗在東宮數為臺臣言董
文用勲舊忠良何以不見用十八年臺臣奏起為山北

遼東道提刑按察使不赴十九年朝廷選用舊臣召為
兵部尚書自是朝廷有大議未嘗不與聞二十年江淮
省臣建議以行臺隸行省朝議未決文用堅持不可從
之轉禮部尚書遷翰林集賢二院學士知祕書監時中
書右丞盧世榮以貨利得幸權要以掊克為能乃建議
曰我立法治財視常歲當倍增而民不擾詔下會議人
無敢言者文用曰此錢取於右丞之家耶將取之於民
耶取於右丞之家則不敢知若取於民則有說矣牧羊

者歲嘗兩剪其毛今牧人日剪其毛而獻之則王者固說其得毛之多矣然而羊無以避寒熱即死且盡毛又可得哉民財有限取之以時猶懼傷殘今刻剝無遺猶有百姓乎世榮不能對丞相安圖謂坐中曰董尚書真不虛食俸祿者議者出皆謝文用世榮竟以是得罪二十二年拜江淮行中書省參知政事時行省長官貴傲同列莫敢仰視晚起稟白如小吏事上官文用至則坐堂上侃侃與論是非無所遷就雖數忤之不顧也有以

帝命建佛塔於宋故宮者有司奉行甚急天大雨雪入
山伐木死者數百人猶欲併建大寺文用請緩之長官
者曰參政奈何格上命文用曰困民力而失民心豈上
意耶其人意沮遂稍寬其期二十三年朝廷將用兵海
東徵斂益急有司大為奸利文用請入奏事大畧言疲
國家可寶之民力取僻陋無用之小邦列其條目甚悉
言上事遂罷二十五年拜御史中丞文用曰中丞不當
理細務吾當先舉賢才乃舉胡祗適王憚雷膺荆幼紀

許揖孔從道十餘人為按察使徐琰魏初為行臺中丞
當時以為極選僧格當國恩寵方盛近戚貴人見之
皆屏息遜避文用獨不附之僧格令人風文用頌己功
於帝前又自示意文用皆不荅會朔方軍興糧糈粗備
而誅求愈急文用見僧格極言其弊益忤僧格意乃撫
拾臺事百端文用日與辨論不為屈於是具奏僧格姦
狀僧格日譖文用於帝帝曰御史職也何罪之有且董
文用端謹朕所素知汝善視之遷大司農時欲奪民田

為屯田文用固執不可遷為翰林學士承旨二十七年
隆福太后在東宮欲使文用授皇孫經具奏以帝命命
之文用每講說經旨必附以朝廷故事反覆開悟皇孫
亦特加敬禮三十一年帝命文用以其諸子入見文用
曰臣蒙國厚恩死無以報臣之子何能為命至再三終
不以見是歲世祖崩成宗將即位上都太后命文用從
行既即位巡狩蹇音布拉克之地每名入帳中問先朝
故事文用亦盛言先帝虛心納賢開國經世之務談說

或至夜半是年詔修先帝實錄命文用知制誥兼修國史文用於祖宗世系功德近戚將相家世勲績皆記憶貫穿史館有所考究質問文用應之無遺失大德元年請老官一子於鄉郡侍養尋卒子八人士貞士亨士楷士英士昌士恒士廉士方贈壽國公謚忠穆

文忠字彥誠歲壬子入侍世祖潛邸癸丑從征南詔已未伐宋興兄文炳文用敗宋兵於陽羅堡世祖即位置符寶局以文忠為郎居益近密嘗呼董八而不名文忠

不為容悅隨事獻納中禁事祕外多不聞至元二年安
圖以右丞相入領中書建陳十事忤旨文忠曰丞相素
有賢名今秉政之始人方傾聽所請不得後何以為遂
從旁代對懇惓詳切始得允可十一年伐宋民困供饋
文忠奏免常歲橫征從之帝嘗見宋降將問宋所以亡
者皆曰賈似道當國薄武人而重文儒將士怨之故大
軍至爭解甲歸命也帝問文忠此言何如文忠因詰之
曰似道薄汝矣而君則未嘗薄汝也有怨於相而移於

君坐視亡國如臣節何然則似道薄汝固豫知汝曹不足恃耳帝深善之有旨徙大都獵戶於郢中文忠奏止之又請罷官鬻田器之稅聽民自為時多盜詔犯者殺無赦文忠言殺人取貨與竊一錢者均死恐乖陛下好生之德敕草之或告漢人毆傷國人及太府監屬盧甲盜剪官布帝怒命殺以懲衆文忠言宜付有司開實以俟後命乃遣文忠及近臣圖們分覈之皆得其誣狀詔原之帝責侍臣曰方朕怒時卿曹皆不言非董文忠開

悟朕心則殺及無辜取議中外矣自安圖北伐阿哈瑪特獨當國大立親黨懼廉希憲復入相奏希憲以右丞行省江陵文忠言希憲國家名臣今宰相虛位不可使

久居外宜早召還從之

按廉希憲傳云阿爾哈雅下江陵請重臣鎮之帝使希憲行省

荆南希憲疾久不愈文忠言江陵卑濕如希憲病何帝即召還事異本傳

十六年禮部尚書

謝昌元請立門下省封駁制敕以絕口書風曉近習奏請之弊帝銳意欲行之詔廷臣雜議廷臣奏以文忠為侍中及其屬數十人近臣進言曰陛下將別置省須得

人以任今聞盜詐之臣與居其間不可其言多指文忠
文忠忿辨曰上每稱臣不盜不詐今彼顧臣而言意實
在臣其顯言臣盜詐何事帝令言者出文忠猶訴不止
且攻其害國之姦帝曰朕自知之彼不汝言也其人欲
中害之然以文忠清慎無過乃求交驩文忠卻之文炳
為中書左丞卒太傅巴延薦文忠可相帝使繼其官文
忠辭曰臣兄有平定南方之勞可居是位臣何功敢冒
居重職乎十八年升典瑞監卿改僉書樞密院事車駕

行幸詔文忠留居大都凡宮苑城門直舍徼道環衛營屯禁兵太府少府軍器尚乘諸監皆領焉兵馬司舊隸中書并付文忠時權臣累請奪還中書不報是冬卒封

壽國公諡忠貞

名臣事畧作正獻

汪德臣字舜輔賜名特格鞏昌鹽州人隴西公世顯子

也按原史汪德臣等傳附汪世顯傳後今移世顯入貳臣酌存德臣傳而以其子若弟附于其後年十

四襲爵鞏昌等二十四路便宜都總帥從征蜀將前軍出忠浹進攻運山所乘馬中飛石死步戰拔外城宋將

余玠攻漢中德臣馳赴之玠遁去憲宗命城沔州沔據嘉陵要路德臣繕治室廬部署官屬數日而集進攻嘉定敵潛軍夜出德臣迎戰殺百人還至左綿雲頂宋軍乘夜斫營覺之殺千人生擒百人進次隆慶宋軍仍夜出與力戰盡殺之及馬漕溝遇伏兵與戰獲其統制羅廷鶚又命城益昌諸戍皆聽節制世祖以皇弟有事西南德臣入見乞免益昌徭賦及漕糧屯田為長久計並從之即命置行部於鞏立漕司於沔通販鬻給餽餉奏

乞以兄忠臣攝府事使已得專事益昌益昌為蜀襟喉
蜀人憚其威名諸郡環視莫敢出闕甲寅春旱嘉陵漕
舟水澁議者欲棄去德臣曰國家以蜀事付我有死而
已奈何棄之盡殺所乘馬饗士襲嘉川得糧二千餘石
雲頂呂遠將兵邀戰即陣擒之復得糧五千石既而水
陸運至屯田麥亦登食用遂給獲宋提轄崔忠鄭再立
縱令持檄諭苦竹守將南清以城降所俘民悉歸之東
南戊午數百有去志德臣揣知之給券縱去皆泣謝未

幾山寨相繼輸款宋將余晦遣都統甘閏以兵數萬城
紫金山德臣即選精卒銜枚夜進大破之閏僅以身免
南清北覲其下殺清妻子以叛蜀將焦遠領兵餉之德
臣擊敗遠盡獲所餉資糧蜀兵至又敗之戊午帝親征
次漢中嘉陵白水交會勢洶急帝問船幾何可濟德臣
曰大軍百萬非可淹延當別為方略即命繫舟為梁一
夕而成如履坦途苦竹既逆命至是攻之巖壁峭絕或
請建天橋帝以問德臣曰臣知先登陷陣而已建橋非

所知既而橋果無功乃率將士魚貫進帝望見歎曰人
言特格膽勇豈虛譽耶宋將趙仲武納款而楊禮猶拒
戰奮擊盡殺之宋龍州守將王德新遣所親願効順以
郡民為祈奏如其請復拔長寧斬守將王佐帝東下德
臣為先鋒抵大獲山奪水門宋將楊大淵遣子乞活數
萬人命引至帝前為請旦日大淵率眾降按楊大淵傳云遣王仲入
招大淵大淵殺之憲宗起督諸已而運山青居大良皆
軍力攻大淵懼遂降與本傳異降攻釣魚山守臣王堅負險不下德臣單騎至城下大

呼曰王堅我來活汝一城軍民宜早降語未既幾為飛石所中遂感疾帝遣使問勞俾還益昌奏曰陛下尊為天子猶冒寒暑服勞於外臣待罪行伍死其分也尋卒追封隴西公謚忠烈長子惟正襲弟良臣

良臣年十六從兄德臣出征以功擢裨將癸丑歲以德臣薦為鞏昌帥領所部兵屯白水憲宗親征軍至六盤良臣還鞏昌治供億事集而民不擾詔權便宜總帥府事良臣奏願與兄德臣定四川帝曰行軍餽餉所係

不輕汝任其責自可立功既奉命治橋梁平道路營舟
車水陸無壅世祖即位阿勒達爾琿塔噶逆命劫六盤
西陲騷動詔良臣討之至耀碑谷兩軍相當良臣慷慨
誓諸將會大風揚沙晝晦良臣手刃數十人衆軍乘之
賊大潰獲阿勒達爾琿塔噶殺之中統二年和爾叛復
討平之累授閬蓬廣安順慶等路征南都元帥良臣以
釣魚山險絕不可攻請就近築城以扼其往來四年春
良臣攻重慶與宋將朱禕孫兵交良臣塞其歸路引兵

橫擊之斷敵兵為二敵敗走趨城不得入盡殺之至元
六年授東川副統軍遷西川行樞密院事十一年進攻
嘉定咎萬壽堅守不出良臣度有伏兵大搜山谷進壘
薄城大破之萬壽乞降紫雲瀘叙相繼款附還圍重慶
十三年宋涪州安撫楊立帥兵救重慶良臣敗走之安
撫張珏襲據瀘州良臣還軍平之十五年張珏遣衆鏖
戰良臣奮擊大破之珏所部趙安開門納降珏潛邀良
臣禁俘掠發粟賑饑民大悅四川悉平入覲授中書左

承行四川中書省事良臣陳治蜀十五事世祖喜納還
至成都以蜀瘡痍之餘極意撫循行省罷改授安西王
相不赴十八年卒追封梁國公諡忠惠

惟正字公理幼穎悟喜從文士論議古今尤喜談兵時
出游獵則勒從騎為攻守狀父德臣卒於軍襲爵守青
居山初憲宗遣渾塔噶以騎兵二萬守六盤又遣奇塔
特布哈守青居至是渾塔噶叛奇塔特布哈發兵為應
惟正即命力士縛斬之世祖嘉其功詔東川軍事悉聽

處分中統三年部長輝圖叛民大擾惟正謂將吏曰輝圖今若獐犬方肆狂齧當勝以不戰乃發兵踵之賊欲戰不得休則撓之若是者兩月知其糧盡勢蹙曰可矣與戰屢捷輝圖遣人來約降陽許之因潛兵躡其後出其不意擒殺之至元七年宋人修合州詔立武勝軍以拒之惟正臨嘉陵江作柵扼其水道夜懸燈柵間編竹為籠中置火炬順地勢轉走照百步外以防不虞宋人知有備不敢近九年丞相已延克襄陽議取宋惟正奏

曰蜀未下者數城耳宜併力攻餘抗願以本兵由嘉陵
下夔峽與已延會錢塘帝優詔答之未幾兩川樞密院
合兵圍重慶命益兵助之惟正奪其洪崖門獲宋將何
統制皇子安西王出鎮秦蜀召惟正還十四年冬皇子
北伐藩王圖嚕叛於六盤王相府命布色岱領兵進討
惟正為副布色岱不習兵師行無紀惟正為正部曲肅
行陣嚴斥候凡軍政一倚重焉進次平涼簡鞏兵銳者
八十人與俱至六盤圖嚕先據西山惟正分安西兵為

左右翼軍兵獨居中去里許皆下馬手弓圖噶遣騎突
陳惟正令引滿毋發將及又命曰視必中而發於是矢
下如雨突騎中者三之一餘盡馳還圖噶軍遂走麾兵
逐之三踰山圖噶就擒安西王亟稱其功授開城路宣
慰使十七年遷中書左丞行秦蜀中書省事蜀土荐罹
兵革民無完居惟正留意撫循人便安之二十二年改
授陝西行中書省左丞入覲上都還至華州卒謚貞肅
欽定續通志卷四百五十四